



## SLUŽBA ZA REVIZIJU FINANSIRANJA POLITIČKIH STRANAKA

Na osnovu člana 10. stav (1) Zakona o finansiranju političkih stranaka («Službeni glasnik BiH» br. 95/12 i 41/16), člana 25. Pravilnika o godišnjim finansijskim izvještajima političkih stranaka («Službeni glasnik BiH» br. 96/13, 89/16 i 5/22) i člana 12. Pravilnika o administrativnim procedurama pregleda, kontrole i revizije finansijskih izvještaja političkih stranaka («Službeni glasnik BiH» broj 103/08 i 5/22), izdajem

### IZVJEŠTAJ O PREGLEDU GODIŠNJEG FINANSIJSKOG IZVJEŠTAJA ZA 2020. GODINU **LIBERALNE STRANKE BOSNE I HERCEGOVINE**

Broj: 03-07-6-804/21  
Sarajevo, 07.12.2022. godine

## SADRŽAJ

MIŠLJENJE REVIZORA .....	3
1. UVOD .....	4
2. PREDSTAVLJANJE POLITIČKE STRANKE .....	4
3. OPIS PREGLEDA I KONTROLE FINANSIJSKOG IZVJEŠTAJA .....	5
Predmet pregleda i kontrole.....	5
Cilj pregleda i kontrole .....	5
Obim pregleda i kontrole .....	5
4. PRETHODNE KONTROLE I REVIZIJE.....	5
5. NALAZI I PREPORUKE .....	5
5.1 NALAZI.....	5
5.2 PREPORUKE .....	9

## **MIŠLJENJE REVIZORA**

Služba za reviziju finansiranja političkih stranaka izvršila je pregled godišnjeg finansijskog izvještaja Liberalne stranke Bosne i Hercegovine za 2020. godinu i finansijskog izvještaja za period od dana podnošenja prijave za ovjeru za izbore do dana ovjere rezultata Lokalnih izbora, održanih u novembru 2020. godine.

Rukovodstvo političke stranke je odgovorno za finansijske izvještaje, postupanje stranke u skladu sa odredbama Zakona o finansiranju političkih stranaka i odredbama poglavlja 15 Izbornog zakona Bosne i Hercegovine, te uspostavljanje efikasnog sistema internih kontrola.

Pregled smo obavili u skladu sa revizijskim standardima primjenjivim na angažmanu u pregledu. Ovi standardi zahtijevaju da planiramo i izvršimo pregled da bi dobili umjerenu pouzdanost da stranka nije značajno kršila odredbe Zakona o finansiranju političkih stranaka.

Pregled je ograničen na kontrolu godišnjeg finansijskog izvještaja političke stranke i primjenu analitičkih procedura na podacima iz finansijskih izvještaja, pa prema tome ne obezbjeđuju pouzdanost koja bi se dobila izvršenom revizijom u prostorijama stranke.

**Pregledom godišnjeg finansijskog izvještaja za 2020. godinu, utvrđeno je da je Liberalna stranka Bosne i Hercegovine prekršila odredbe člana 4. stav (1), člana 8. stav (1), člana 11. stav (1) i člana 12. stav (1), stav (3) i stav (4) Zakona o finansiranju političkih stranaka i člana 15.1 stav (1) Izbornog zakona Bosne i Hercegovine.**

**Na osnovu našeg pregleda, odnosno kontrole finansijskog izvještaja, osim gornje napomene, nismo zapazili ništa značajno što bi ukazalo na nedostatke u finansijskom izvještaju ili na finansiranje ove političke stranke suprotno odredbama Zakona o finansiranju političkih stranaka, niti na finansiranje troškova izborne kampanje suprotno odredbama člana 15.10 Izbornog zakona Bosne i Hercegovine.**

## 1. UVOD

Služba za reviziju finansiranja političkih stranaka (u daljem tekstu: Služba za reviziju) izvršila je pregled godišnjeg finansijskog izvještaja Liberalne stranke Bosne i Hercegovine za 2020. godinu i finansijskog izvještaja za period od dana podnošenja prijave za ovjeru za izbore do dana ovjere rezultata Lokalnih izbora, održanih u novembru 2020. godine.

Pregled i kontrola finansijskog izvještaja su provedeni u skladu sa članom 25. Pravilnika o godišnjim finansijskim izvještajima političkih stranaka i članom 2. Pravilnika o administrativnim procedurama pregleda, kontrole i revizije finansijskih izvještaja političkih stranaka.

Zbog činjenice da nije obavljena revizija u prostorijama političke stranke, postoji mogućnost da pojedine materijalno značajne greške ne budu otkrivene.

Prema podacima iz godišnjeg finansijskog izvještaja, Liberalna stranka Bosne i Hercegovine finansirala se iz sljedećih izvora:

R/B	Izvori finansiranja	Iznos (KM)	Struktura (%)
1.	Članarina	0,00	0,00
2.	Prilozi fizičkih lica ( 3-a )	0,00	0,00
3.	Prilozi pravnih lica ( 3-b )	0,00	0,00
4.	Prihodi od imovine ( 3-c )	0,00	0,00
5.	Prihodi od dobiti preduzeća u vlasništvu političke stranke ( 3-d )	0,00	0,00
6.	Prihodi od poklona ( 3-e )	0,00	0,00
7.	Prihodi iz budžeta ( 3-f )	68.551,19	98,91
8.	Prihodi od propagande ( 3-g )	0,00	0,00
<b>I</b>	<b>Ukupni prihodi (1-8)</b>	<b>68.551,19</b>	<b>98,91</b>
<b>II</b>	<b>Ostali prihodi i drugo</b>	<b>756,00</b>	<b>1,09</b>
	<b>Izvori finansiranja (I+II)</b>	<b>69.307,19</b>	<b>100,00</b>

U godišnjem finansijskom izvještaju stranka je iskazala rashode u ukupnom iznosu od 76.299,63 KM.

## 2. PREDSTAVLJANJE POLITIČKE STRANKE

Naziv političke stranke je Liberalna stranka Bosne i Hercegovine. Skraćeni naziv stranke je LS BiH.

Liberalna stranka Bosne i Hercegovine registrovana je kod Općinskog suda u Goraždu, rješenjem broj: 045-0.F1-13-000 002 od 23.12.2013. godine.

Sjedište političke stranke je u Goraždu, ulica Seada Sofovića Sofe bb.

Lica ovlaštena za zastupanje stranke su Daliborka Milović, predsjednica stranke i Slobodan Janković, podpredsjednik stranke.

Lice ovlašteno za podnošenje finansijskih izvještaja za 2020. godinu je Dino Vektor d.o.o..

Prema podacima iz godišnjeg finansijskog izvještaja za 2020. godinu, organizacionu strukturu Liberalne stranke Bosne i Hercegovine čine:

- Glavni odbor LS BiH,
- Kantonalni odbor Goražde i
- 2 opštinska odbora.

### 3. OPIS PREGLEDA I KONTROLE FINANSIJSKOG IZVJEŠTAJA

**Predmet pregleda i kontrole** je godišnji finansijski izvještaj Liberalne stranke Bosne i Hercegovine za 2020. godinu i finansijski izvještaj za period od dana podnošenja prijave za ovjeru za izbore do dana ovjere rezultata Lokalnih izbora, održanih u novembru 2020. godine.

**Cilj pregleda i kontrole** je da revizor na bazi finansijskog izvještaja pokuša da ustanovi da li je politička stranka u izvještajnom periodu postupala u skladu sa odredbama Zakona o finansiranju političkih stranaka i odredbama člana 15.10 Izbornog zakona Bosne i Hercegovine. Ukoliko revizor na bazi kontrole finansijskog izvještaja utvrdi određena kršenja navedenih zakona, ocjenjuje da li je potrebno izvršiti reviziju u prostorijama stranke da bi mogao izraziti mišljenje o tome da li se stranka finansirala u skladu sa Zakonom o finansiranju političkih stranaka.

**Obim pregleda i kontrole** finansijskih izvještaja Liberalne stranke Bosne i Hercegovine obuhvata kontrolu i provođenje analitičkih procedura radi utvrđivanja usklađenosti podataka koje je stranka iskazala u finansijskom izvještaju sa odredbama Zakona o finansiranju političkih stranaka, odnosno usklađenosti izvora finansiranja i načina trošenja sredstava.

### 4. PRETHODNE KONTROLE I REVIZIJE

Služba za reviziju je izvršila pregled i reviziju finansijskih izvještaja Liberalne stranke Bosne i Hercegovine u periodu od 2014. do 2019. godine, nakon kojih su izdati izvještaji o pregledu sa mišljenjem revizora, nalazima i preporukama revizije.

Nakon izvršenog pregleda godišnjeg finansijskog izvještaja Liberalne stranke Bosne i Hercegovine za 2019. godinu, izdat je izvještaj o pregledu sa mišljenjem revizora, nalazima i preporukama stranci da finansijska sredstva obezbijedena za finansiranje stranke koristi u skladu sa utvrđenim programom utroška sredstava, da se ne finansira iz izvora koji su zabranjeni, da uspostavi tačne i pravilne evidencije o rashodima i obavezama, odnosno da poslovne knjige vodi u skladu sa računovodstvenim propisima, da finansijske izvještaje koje podnosi Centralnoj izbornoj komisiji Bosne i Hercegovine popunjava u skladu sa Pravilnikom o godišnjim finansijskim izvještajima političkih stranaka i da, imajući u vidu strukturu troškova stranke i činjenicu da se finansira isključivo iz budžeta, racionalnije troši finansijska sredstva.

#### **Nerealizovane preporuke:**

Na osnovu uočenih nedostataka u godišnjem finansijskom izvještaju za 2020. godinu, utvrđeno je da Liberalna stranka Bosne i Hercegovine nije ispoštovala sve preporuke.

### 5. NALAZI I PREPORUKE

#### 5.1 NALAZI

#### **a) Liberalna stranka Bosne i Hercegovine prekršila je odredbe člana 4. stav (1) Zakona o finansiranju političkih stranaka.**

U godišnjem finansijskom izvještaju stranka je iskazala rashode u ukupnom iznosu od 76.299,63 KM. U Revidiranom programu utroška sredstava za 2020. godinu stranka je planirala ukupne troškove u iznosu od 80.000,00 KM.

Analizom Revidiranog programa utroška sredstava za 2020. godinu utvrđeno je da stranka sredstva nije utrošila u skladu sa planiranim troškovima, čime je prekršila odredbe člana 4. stav (1) Zakona o finansiranju političkih stranaka.

(1) Pregledom finansijskog izvještaja i finansijske dokumentacije stranke utvrđeno je da politička stranka nije planirala troškove kamata, troškove ostalog materijala, troškove održavanja

opreme, troškove advokatskih usluga i sudskih troškova, troškove usluga, troškove ugostiteljskih usluga i troškove novčane kazne.

Stranka je u 2020. godini navedene troškove ostvarila u ukupnom iznosu od 7.006,41 KM, i to: troškove kamata u iznosu od 901,01 KM, troškove ostalog materijala u iznosu od 757,05 KM, troškove održavanja opreme u iznosu od 1.143,35 KM, troškove advokatskih usluga i sudskih troškova u iznosu od 1.810,00 KM, troškove usluga u iznosu od 70,00 KM, troškove ugostiteljskih usluga u iznosu od 1.325,00 KM i troškove novčane kazne u iznosu od 1.000,00 KM.

Takođe, utvrđeno je da je stranka prekoračila planirane troškove goriva i maziva, telefonske troškove i ptt usluge i humanitarne rashode-troškove novčane pomoći, kako slijedi:

- Troškove goriva i maziva stranka je prekoračila za 1.509,92 KM. U programu utroška sredstava stranka je planirala troškove goriva i maziva u iznosu od 10.000,00 KM, a iste je ostvarila u iznosu od 11.509,92 KM;
- Stranka je planirala telefonske troškove i ptt usluge u iznosu od 2.000,00 KM, a iste je ostvarila u iznosu od 3.131,24 KM, što je za 1.131,24 KM više u odnosu na planirane; i
- Stranka je humanitarne rashode-troškove novčane pomoći planirala u iznosu od 5.000,00 KM, dok je iste ostvarila u iznosu od 14.100,00 KM, što je za 9.100,00 KM više u odnosu na plan.

(2) Stranka je u toku 2020. godine ostvarila troškove goriva i maziva u iznosu od 11.509,92 KM.

Na osnovu Odluke predsjednice Liberalne stranke Bosne i Hercegovine<sup>1</sup> za potrebe i rad stranke korišteno je vozilo marke Citroen C5. Takođe, Odlukom predsjednice stranke broj: 60-2-B-10-1/20 od 02.10.2020. godine aktivisti stranke je odobreno da za potrebe terenskog rada može sipati benzin BMB 95 BAS u iznosu od 100,00 KM, radi promocije kandidata Liberalne stranke Bosne i Hercegovine.

Uvidom u račune za isporučeno gorivo, utvrđeno je da je dobavljač TZS „Oil“ d.o.o. Vitkovići stranci mjesečno ispostavljao fakture za gorivo (dizel i BMB)<sup>2</sup>, te druge robe (tekućina za vjetrobrane, motorno ulje i dr.) u iznosima od 75,17 KM do 1.615,00 KM, odnosno ukupno 11.509,92 KM. Isto tako, a prema podacima iz dostavljenih otpremnica, utvrđeno je da je istom vozilu (vozilo istih registarskih tablica) osim dizel goriva, isporučeno i gorivo benzin BMB 95 BAS u martu 2020. godine u iznosu od 29,98 KM i aprilu 2020. godine u iznosu od 51,22 KM, što ukazuje da je stranka vršila plaćanje goriva koje nije mogla sipati u motorno vozilo koje je koristila.

Imajući u vidu da stranka nije dostavila naloge za službena putovanja niti putne naloge iz kojih bi se utvrdila svrha putovanja, relacija putovanja i pređena kilometraža, u postupku pregleda finansijskog izvještaja nije bilo moguće utvrditi u koju svrhu je utrošeno gorivo, tj. u koju svrhu su utrošena finansijska sredstva stranke.

#### **b) Stranka je prekršila odredbe člana 8. stav (1) Zakona o finansiranju političkih stranaka.**

Liberalna stranka Bosne i Hercegovine je primila novčana sredstva od Federalnog zavoda za zapošljavanje Sarajevo u iznosu od 756,00 KM, čime je prekršila odredbe člana 8. stav (1) tačka b) Zakona o finansiranju političkih stranaka.

Stranka je u toku 2020. godine primila novčana sredstva od Federalnog zavoda za zapošljavanje Sarajevo po osnovu Ugovora o sufinansiranju zapošljavanja-Periodično/sezonsko zapošljavanje 2019. godine u ukupnom iznosu od 756,00 KM.

<sup>1</sup> Odluka o korištenju auta za potrebe stranke broj: 01-1-1/20 od 03.01.2020. godine.

<sup>2</sup> Isporučeno je gorivo u količinama od 42 do 1.140 litara mjesečno.

Suprotno odredbama Zakona o finansiranju političkih stranka, stranka je primila finansijska sredstva od javne institucije, odnosno finansirala se iz izvora koji je zabranjen Zakonom.

**c) Politička stranka prekršila je odredbe člana 11. stav (1) i člana 12. stav (1) i stav (4) Zakona o finansiranju političkih stranaka.**

Na osnovu pregleda godišnjeg finansijskog izvještaja i dodatne finansijske dokumentacije, utvrđeno je da Liberalna stranka Bosne i Hercegovine nije uspostavila pravilne, potpune i pravovremene evidencije o rashodima i obavezama i nije pravilno popunila obrasce godišnjeg finansijskog izvještaja, čime je prekršila odredbe člana 11. stav (1) i člana 12. stav (1) i stav (4) Zakona o finansiranju političkih stranaka i odredbe Pravilnika o godišnjim finansijskim izvještajima političkih stranaka („Službeni glasnik BiH“ br. 96/13 i 89/16)-u daljem tekstu: Pravilnik.

Isto tako, utvrđeno je da stranka troškove nije evidentirala u momentu nastanka troška, dio troškova iz ranijih godina evidentirala je kao troškove tekućeg perioda, dok računi koji su knjigovodstvene isprave o nastalim poslovnim događajima<sup>3</sup> nisu ovjereni i odobreni za knjiženje i plaćanje, što je suprotno računovodstvenim propisima i praksi.

(1) Stranka je finansijska sredstva u iznosu od 756,00 KM koja je primila od Federalnog zavoda za zapošljavanje Sarajevo iskazala kao ostale prihode, čime je prekršila odredbe člana 13. i 15. Pravilnika.

(2) Pregledom godišnjeg finansijskog izvještaja, poslovnih knjiga i dodatne dokumentacije, utvrđeno je da stranka nije uspostavila pravilne, potpune i pravovremene evidencije o rashodima i obavezama stranke, te ih nije pravilno iskazala u godišnjem finansijskom izvještaju, čime je prekršila odredbe člana 21, 22, 23. i 24. Pravilnika.

- Uvidom u analitičke kartice troškova, utvrđeno je da je stranka u poslovnim knjigama za 2020. godinu evidentirala i dio troškova po računima iz ranijih godina, što ukazuje da poslovne knjige ne vodi u skladu sa računovodstvenim propisima.

1. Stranka je u poslovnim knjigama evidentirala troškove štampanja brošura po osnovu ispravke pogrešnog knjiženja računa dobavljača „Face art“ u 2019. godini u iznosu od 278,61 KM. Stranka je navedeni trošak iskazala u obrascu 4.2 (troškovi propagande) godišnjeg finansijskog izvještaja, čime je prekršila odredbe člana 21, 22. i 23. Pravilnika.

2. Stranka je u obrascu 4.1 (režijsko-administrativni i ostali troškovi) godišnjeg finansijskog izvještaja iskazala pogrešne podatke o troškovima, tj. troškove iz ranijeg perioda je iskazala kao ugostiteljske usluge, troškove zakupnine poslovnih prostorija i troškove električne energije.

Na kontu 40109-*Ugostiteljske usluge* stranka je evidentirala troškove po računima dobavljača „Mesara Bratić“ iz 2019. godine u ukupnom iznosu od 1.325,00 KM. Isto tako, stranka je troškove zakupnine poslovnih prostorija iz ranijih godina u iznosu od 91,28 KM, te troškove električne energije iz ranijih godina u iznosu od 585,45 KM evidentirala kao troškove tekućeg perioda.

Stranka je navedene troškove trebala iskazati kao rashode prethodnih godina.

Pored navedenog, utvrđeno je da je stranka i troškove toplog obroka za decembar 2019. godine u ukupnom iznosu od 336,00 KM iskazala kao troškove tekućeg perioda.

---

<sup>3</sup> U skladu sa računovodstvenim propisima, sadržaj knjigovodstvene isprave mora nedvojbeno i vjerodostojno pokazivati vrstu i obim nastale promjene (kupovina, količina, cijena, ukupan iznos), karakter poslovne promjene u knjigovodstveno-tehničkom smislu, tehnička obilježja i sl.

- Kontrolom humanitarnih rashoda utvrđeno je da je stranka na osnovu odluka predsjednice Liberalne stranke Bosne i Hercegovine izvršila isplatu novčanih sredstava fizičkim licima, članovima i simpatizerima stranke povodom praznika u iznosu od 5.500,00 KM i isplate pomoći fizičkim licima za COVID 19 u iznosu od 1.000,00 KM, odnosno ukupno 6.500,00 KM.

Uvidom u poslovne knjige utvrđeno je da stranka na isplaćena sredstva nije obračunala, a ni platila porez na dohodak i doprinose. Stranka ni u godišnjem finansijskom izvještaju nije iskazala obaveze nastale po osnovu poreza na dohodak i doprinose na sredstva isplaćena fizičkim licima.

- Uvidom u Zapisnik o inspekcijском nadzoru broj: 13-5-01-15-20-267-1/19 od 26.12.2019. godine i Rješenje o dodatno utvrđenim obavezama broj: 13-5-01-15-20-267-2/19 od 06.01.2020. godine, utvrđeno je da je Porezna uprava Federacije BiH-Kantonalni porezni ured Goražde izvršio terensku kontrolu poreskih obaveza iz nadležnosti Porezne uprave Federacije BiH kod poreskog obveznika Liberalna stranka Bosne i Hercegovine u periodu od 11.01.2018. godine do 31.12.2018. godine.

Kantonalni porezni ured Goražde je izvršio obračun poreza na dohodak i doprinosa na sredstva koja je stranka isplatila fizičkim licima po osnovu humanitarne pomoći, kupovine zlatnog-srebrnog i ostalih nakita i korištenja mobilnog telefona, te na isplate goriva drugim fizičkim licima u 2018. godini u ukupnom iznosu od 6.739,86 KM, te je obračunao i kamate na porez na dohodak i doprinose u iznosu od 900,56 KM, odnosno dodatno su utvrđene ukupne obaveze u iznosu od 7.640,42 KM.

Činjenica da je stranka u poslovnim knjigama za 2020. godinu uknjižila dodatno utvrđene poreske obaveze iz 2018. godine ukazuje da stranka ne vodi pravilne i pravovremene evidencije o svojim rashodima i obavezama.

- (3) Liberalna stranka Bosne i Hercegovine za 2020. godinu nije na pravilan način popunila obrazac 5 (obaveze) godišnjeg finansijskog izvještaja, čime je prekršila odredbe člana 24. Pravilnika.

Stranka je u obrascu 5 godišnjeg finansijskog izvještaja iskazala obaveze prema dobavljačima u ukupnom iznosu od 14.021,60 KM, bez navođenja podataka o svakom dobavljaču pojedinačno.

Uvidom u poslovne knjige, utvrđeno je da stranka ima neizmirene obaveze prema sljedećim dobavljačima: „BH Telecom“ d.d. u iznosu od 1.354,43 KM, „Biro tehnika“ d.o.o. Goražde u iznosu od 260,00 KM, „Centar za kulturu Goražde“ d.o.o. u iznosu od 234,00 KM, „CM-Cosmetics market“ d.o.o. Vitez u iznosu od 284,70 KM, „Čojo“ TR Goražde u iznosu od 793,95 KM, „Faceart“ d.o.o. Goražde u iznosu od 447,72 KM, „Foto Pršeš“ u iznosu od 257,30 KM, Grad Goražde za električnu energiju i zakupninu u ukupnom iznosu od 340,40 KM, „Kenix“ Goražde u iznosu od 1.143,35 KM, „Lelo“ Goražde u iznosu od 1.860,00 KM, „Novogradnja“ d.o.o. Goražde u iznosu od 1.520,52 KM, „TZS Oil“ Goražde u iznosu od 6.161,74 KM i „FMB Komerc“ d.o.o. Goražde u iznosu od 0,07 KM.

U skladu sa članom 24. Pravilnika stranka je imala obavezu da u obrascu 5.2 finansijskog izvještaja navede sljedeće podatke: naziv dobavljača, datum nastanka obaveze i iznos obaveze prema svakom dobavljaču pojedinačno.

Pored navedenog, utvrđeno je da je stranka u poslovnim knjigama na kartici konta obaveza prema dobavljaču Elektrodistribucija iskazala pretplatu u iznosu od 636,58 KM, što upućuje da nema tačne evidencije o svojim rashodima.

Uvidom u poslovne knjige utvrđeno je da je stranka na kontu obaveza prema dobavljaču Elektrodistribucija evidentirala uplatu za električnu energiju u iznosu od 636,58 KM, te da na



karticu nisu evidentirane obaveze. Isto tako, utvrđeno je da stranka plaća Gradu Goražde, zakupninu poslovnog prostora i troškove električne energije, te da ne koristi druge poslovne prostorije osim prostorija u Goraždu.

- (4) Uvidom u poslovne knjige, utvrđeno je da je stranka u 2020. godini iskazala potraživanja po osnovu datih avansa dobavljaču „OR Zlatara S“ Goražde u iznosu od 870,00 KM.

S obzirom da stranka u svojim poslovnim knjigama iskazuje avanse, evidentno je da stranka ne iskazuje sve svoje troškove, odnosno da nema tačne evidencije o svojim troškovima<sup>4</sup>.

Pored navedenog, ističemo da stranka i na dan 31.12.2020. godine ima potraživanja po osnovu pozajmica datih fizičkim i pravnom licu u ukupnom iznosu od 51.000,00 KM.

Kao što je i konstatovano u Izvještaju o pregledu godišnjeg finansijskog izvještaja za 2019. godinu, stranka je u toku 2015. i 2016. godine dala pozajmice jednom pravnom licu i tri fizička lica, u ukupnom iznosu od 51.000,00 KM. Na dva ugovora nije naveden rok za vraćanje pozajmice, već je navedeno da će iste biti vraćene. Na trećem ugovoru je navedeno da je rok za vraćanje pozajmice 36 mjeseci, tj. 11.04.2020. godine, dok je na četvrtom navedeno da je rok za vraćanje pozajmice 31.12.2015. godine. Ni jedna od navedenih pozajmica nije vraćena stranci.

**d) Liberalna stranka Bosne i Hercegovine prekršila je odredbe člana 15.1 stav (1) Izbornog zakona Bosne i Hercegovine i člana 12. stav (3) Zakona o finansiranju političkih stranaka.**

Uvidom u službene evidencije, utvrđeno je da Liberalna stranka Bosne i Hercegovine nije dostavila postizborni finansijski izvještaj-Lokalni izbori u Mostaru 2020. godine, čime je prekršila odredbe člana 15.1 stav (1) Izbornog zakona Bosne i Hercegovine i člana 12. stav (3) Zakona o finansiranju političkih stranaka.

### **Troškovi izborne kampanje**

Prema odredbama člana 15.10 Izbornog zakona BiH, politička stranka za potrebe izborne kampanje ne smije potrošiti više od 0,30 odnosno 0,20 KM<sup>5</sup> po biraču u svakom izbornom krugu, prema broju birača koje je objavila Centralna izborna komisija BiH.

Prema podacima Centralne izborne komisije BiH, Liberalna stranka Bosne i Hercegovine je u svrhu izborne kampanje za Lokalne izbore 2020. godine mogla da potroši sredstva u iznosu od 439.198,80KM, a u svrhu izborne kampanje za Lokalne izbore u Mostaru 2020. godine mogla je da potroši sredstva u iznosu od 30.259,20 KM.

Liberalna stranka Bosne i Hercegovine u godišnjem finansijskom izvještaju za 2020. godinu iskazala je troškove propagande u iznosu od 3.365,82 KM.

## **5.2 PREPORUKE**

***Preporučuje se Liberalnoj stranci Bosne i Hercegovine da se pridržava odredaba Zakona o finansiranju političkih stranaka, a posebno na osnovu uočenih nedostataka se preporučuje:***

- ***da finansijska sredstva obezbijedena za finansiranje stranke koristi u skladu sa utvrđenim programom utroška sredstava,***
- ***da se ne finansira iz izvora koji su zabranjeni,***

<sup>4</sup> Na analitičkoj kartici dobavljača navedeno je da je izvršen prenos salda na potraživanje jer stranka nema račune.

<sup>5</sup> Član 15.10 stav 2. Izbornog zakona BiH propisuje da se maksimalno dozvoljeni iznos za finansiranje izborne kampanje izračunava tako što se broj glasača u svim izbornim jedinicama u kojima politički subjekt ima kandidatsku listu ili kandidata pomnoži sa: 30 feninga za načelnika opštine odnosno gradonačelnika i za članove skupštine opštine, članove Narodne skupštine RS i Predstavničkog doma Parlamenta Federacije BiH, članove Parlamentarne skupštine BiH, člana Predsjedništva BiH, i predsjednika i potpredsjednike RS, odnosno 20 feninga za izbore za članove kantonalnih skupština.

- *da uspostavi pravilne, potpune i pravovremene evidencije o rashodima i obavezama, odnosno da poslovne knjige vodi u skladu sa računovodstvenim propisima,*
- *da finansijske izvještaje podnosi u rokovima i na način utvrđen Zakonom o finansiranju političkih stranaka, odredbama člana 15.1 stav (1) Izbornog zakona Bosne i Hercegovine i podzakonskim aktima,*
- *da poštuje poreske propise, odnosno obračunava i izmiruje poreske obaveze u skladu sa propisima i*
- *da, imajući u vidu strukturu troškova stranke i činjenicu da se finansira isključivo iz budžeta, racionalnije troši finansijska sredstva.*

**KOMENTAR:**

U ostavljenom roku, Liberalna stranka Bosne i Hercegovine nije dostavila primjedbe na nalaze revizije i mišljenje revizora dato u Preliminarnom izvještaju o pregledu godišnjeg finansijskog izvještaja za 2020. godinu.

Šef Odsjeka za revizijske poslove, revizor  
Sanja Tošović

Šef Službe za reviziju  
Mr.sc Hasida Gušić